

B. N. C.
FIRENZE

1035

2



AA X
TOTI
23 7



XXIV






XXIII

~~XXXIV~~

TOLL



JACOBI TOLLII,
Gymnasiarchæ Goudani,
ORATIO
DE
PAC E,

Inter Sereniss. Britanniaë Regem Caro-
lum II, & Præpp. Fœderatæ Belgicæ
Ordines conciliata.

*Ex Auctoritate AA. DD. Scholarcharum postridie Nonas
Septembris, copse reddita proximis maribus pacis die, habita
Gouda in Batavis, Anno clō Iōc LXVII.*

Sophocles Ajace:

Εὖ τοι δοῦλο γὰρ πρὶν ἦεν ἄνθρωπος.

Cum jure enim scire magnam illi vetat.



G O U D Æ,
Ex Officina CORNELII DYVOORT,
Anno clō Iōc LXVII.



Illustri, Magnifico, ac Generoso Viro,
D. FLORENTIO CANT,

Reip. Goudanæ Senatori ac Consuli: eoque nomine maritimis quondam rebus in Amstelædamensi Collegio præfecto: ad Confessum deinde Illustriss. ac Præpotentium D. D. Ordd. Generalium Fæderatæ Belgicæ, Hollandiæ item ac Westfrisiæ Delegato: Literarum Humaniorum cultori, & Literatorum Mæcenati unico,

JACOBUS TOLLIUS S.P.D.

Solebant veteres, siquando Deorum imagines corollis essent ornaturi, nec earum posset contingere fastigium, ponereserta sua ante statuarum pedes: & debito Diis cultu defunctos hoc pacto sese existimantes, & imbecillitatem suam cum proluxa voluntate testati. Quam tibi, Vir illustris, pro immensis in me meosque collatis beneficiis gratiam, & quos honores debeam, nemo, qui modo utrumque nostrum noverit, ignorat. Patere igitur, ut hoc tam levidense munusculum, mea in te grata mentis qualecumque indicium, pedibus tuis subjiciam: ubi adolevero, fortassis, & in virum crevero, daturus capiti coronas, tuis procul dubio meritis longe inferiores; eas tamen, quas a devoto cliente recepisse tibi turpe non fuerit. Vale Lucidum nostræ Reipublicæ Sidus, & quo me hætenus animo suscepisti, fove.

JACOBI TOLLII

ORATIO

DE PACE.

Srenuissime D. Prator ; Ampliff. Prudentiff. D D. Consules , Scabini , & Senatores hujus urbis Magistratus ; Consultiiff. Spectatiiff. D D. Curatores ; Reverendi Vigilantiiff. Pastores ; Doctiffimi cujuscunque facultatis Doctores atque Magistri ; Honorandi College ; Quotquot porro adestis indigenæ , advenæ , dignitate , natalibus , eruditione , aut virtute conspicui Auditores ; Tuque Florentiffima studiosa luventuris Corona , parentum patriæque spes & columen.



UO die Libertas Græciæ memorabili ad Chæroneam prælio concidit atque concisa est , Philippum Mac. adeo callide victoriæ læticiam dissimulasse ferunt , ut victorem illum nemo sentiret , nemo exsultantis in illo animi deprehenderet indicium. Quum lætis acclamantis populi vocibus personaret æther ; quum accensis odoribus templa fumerent ; quum cumulatis passim hostiis gement alitaria ; quum conviviis & epulis omnium ædes perstreperent ; & festis ignibus collucent urbes : non ipse Rex solita sacra fecit ; non risit in convivio ; non ludos inter epulas adhibuit ; non coronas sumpsit , non unguenta. Astutus Macedo vici licet populi , potentis tamen adhuc & validi captabat benevolentiam , ut incautos , nihilque tale me-

J. TOLLII ORATIO

tuentes arctiori servitutis vinculo impediret, & jugum tandem imponeret, quod ne reciperent, toties cum Persis, aliquoties cum ipso fuerat bellatum. Bellum nobis cum Anglis fuit, Cives, longe gravissimum, & utrique genti victæ victricique pariter perniciosum. Post alternatas clades & mutuas cædes itum tandem est in foedera & leges Pacis: sic tamen, ut quæ Pars pacem pertinacissime negaverat, dum accisis deinde sub ipsis oculis rebus avidius arripit, victam se fateri, & ultro herbam porrigere videretur. Cujus insperatæ gloriæ lætitiâ adeo non sibi ficta simulatione nostri Proceres obnubilandam censuere, ut tanto potius impense magis ostendere & aperire satagant, quanto gloriosius est, & magnificentius, libertatem tueri, quam pessumdare; quanto pax honesta injusto bello præferenda est, propter quam bellum geritur, & nos tantum sanguinis effudimus. Est quidem ille in omni victoria sollemnis mos, ut fortunam partium ignium late refulgentium splendore victores emetiantur; usurpatus & a nobis, & ne nos cum Philippo aliquo contulisse pedem existimarem, ab Carolo, etiam quum vinceretur. Sed deërat ille quasi exsultantium linguarum mucro: & retusæ omnium voces non victoriam aliquam decantare, sed exposcere pacem videbantur. Confecta
nunc,

D E P A C E.

nunc, nunc confirmata Pax est: & quod omni nobis pace majus est, erepta Britanno gloria, posse se pacem dare. Liceat præfiscini dixisse, Pacem nostra nobis cum Deo virtus, & haud adversis cedens animus adquisivit. Pacem igitur omnia crepant: pacem cantus plaususque civium præferunt: pacem privatarum ædium, pacem templorum convexa resonant; pacem omnium animi cogitant; pacem vigilantes; pacem in somniis amplectuntur. Insidet omnium vultibus ingens & una hilaritas: privatos dolores publica dispungit felicitas; & ebriæ gaudio mentes lætitiâ refundunt. Augēt aviditatem copia: quamque plus bibere, tam magis sitiunt, nec satiantur. Non capiunt, quā perfundi se sentiunt voluptatem: & omnis ætas, uterque sexus, ad accendendos ignes Felicitati Publicæ æmulatione mutua accenditur. Præcipiunt enim animis, & haud frivolis inducī argumentis augurantur, stabilem fore posthac pacem, & æternam, quam post exitiale cum Cromwellio bellum variis male fotam reconciliationibus inde sacra fames auri, & alieni inexplēta libido, hinc indignatio, nihilque libenter de suo largiens parcimonia abruperat. Fœda res & pudenda dictu: duo populi arctissima quondam devincti amicitia, uniusque in Divini Numinis

J. TOLLII ORATIO

cultus tot inter variantes hominum opiniones, sententiarum concordia ad constantem & indissolubilem, ut videbatur, sincerissimae societatis copulam adstricti, obliti pristinae amicitiae, obliti foederum, obliti divinarum humanarumque necessitudinum, tamquam divinitus alienata mente, in mutuas repente conspirant caedes, & in sua praene viscera parricidiale stringunt ferrum. Juvat animum respicere spatia praeteriti temporis, & avorum nostrorum acta diligentius revolvere, ut excussis tantorum malorum causis, initiis, & progressibus liqueat tandem, quid hoc bello, quid hac pace decoris & gloriae, quid utilitatis & commodi Patriae nostrae partum sit & acquisitum. Jam fessus curis Carolus Hispanici regni habenas, & quidquid in has sibi terras imperii fuerat, Philippo filio transdiderat: &, ut erat cautus & prudens princeps, cum his dederat monita, ne liberos Belgicae spiritus arctius comprimens in suam suorumque perniciem cogeret erumpere. Jam hic senilibus Patris contemptis praecipitis, contra praescripta patriae, & datam jurejurando fidem, externos milites, & in quorum naturam, quanto facie Belgae propior, tanto moribus concesserat, Hispanos induxerat. Jam Libertati gentis innoxiae medicabatur exitium: quum immissi in plebem

DE P A C E.

bem procereſque Quæſtores, dirum genus, qui in omnium animos inquirerent; qui ſecretos cordium excuterent reſceſſus; qui ſeciores de Deo, Deique cultu, ſevere vindicaret opinionationes. Rapti ad quæſtiones & eculeum viri, feminæ, pueri, ſenes: nullum ætatis diſcrimen, nullum ſexus. Non imperatæ noxiis fugæ; non reis exſilia permiſſa, niſi quæ cautiores anteceperant; non in convictos more majorum animadverſum: ſed re-præſentata gentium infidelium ſupplicia, & exquiſitæ mortes: Damnati paſſim ad ignes; ut ignea ſcilicet viſ animæ flammeo curru ſubiret aſtra, atque illic inter cognatos ignes emicaret. Ambuſta & ſemitorta miſerorum cadavera objecta canibus; ut quod inſatiabilis ignium voracitas abſumere negaverat, impudentiſſimorum animantium conficeret ingluvies. Vivi homines effoſſis ſpecubus immiſſi ſepultiſque, ut quorum liberimos ſpiritus non minæ, non verbera, non tormenta potuerant coërcere, reprimeret ac cohiberet mortiferus naturæ carcer, & intercluſa vitalis aura reſrenaret: ut ora ſemper in aſſertionem veri, ſemper in Divinæ Gratiæ præconium patentia injecta deſuper terræ gleba clauderet, obturaretque. Permittebat ſimplex populus tantorum ſcelerum & immanis crudelitatis vindictam ſupremo Numini, cujus

J. TOLLII ORATIO

res agebatur: furentemque tyrannicæ gentis barbariem, si non æquis oculis, animis saltem quietis adspectabat. At ubi detracta tandem Religionis emendandæ larva libertatem ab Albano peti, proculcari, quæ vocant, privilegia, adcoque id agi vidit, ut ab antiquissimis usque temporibus libera sui que juris ac imperii Belgica in provinciæ formam redacta gentis alienæ pateret dominationi, consulendam virtutem pristinam, & Romanis olim metuendam Imperatoribus existimavit; & consuluit: tantisque animis avitæ libertatis ulcionem arripuit, ut Anglorum Regina Elisabetha (qua multis retro sæculis femina excelsioris ac generosi magis animi non fuit) misera laborantis populi, & ex adversis fortiter eluctantis, certatim submitteret auxilia, & armis, viris, nummis renascenti libertati subveniret. Plausibilis hæc & popularis Reginæ benignitas, tantisque scriptorum celebrata præconiis, ut nunquam intermoritura videatur, utinam fuisset plena, neque magna ex parte commodasset sibi! Non potuit, non potuit scilicet exuere penitus feminam, quæ virum pæne induerat. Natura etenim femineo sexui ingeneravit metum, & cum metu custodiendi diligentiam: cujus dum utriusque apud Reginam ratio constat, habent Angli quod loquantur, habent quod taceant. Magna res est,

D E P A C E.

est, fateor, quum inopinatus & periculosus ignis
 aliena tecta depascit, libenter accurrere, & officiosa
 manu proserpentem sedulo restringere: sed perit
 idem meritum, cum proximus ardet Ucalegon, &
 ex imminente par & commune periculum inten-
 tatur: quodque in longe summo maximum fue-
 rat beneficium, fit in vicino necessitas. Quis Da-
 norum æquo ferat animo gloriantem Baravum, se
 Danici alterum conditorem Regni, se collapsi Re-
 gii decoris instauratorem, quum etiam nunc sub
 immenso contracti suppetiis illis persolvendis æris
 alieni pondere gemant, & infeliciter in nostram
 gratiam tentari belli fortunam deplorent? Ille de-
 mum magni fuisse animi; ille solida beneficia con-
 tulisse censendus est, non qui ad commoda quæ-
 que sua metitur, suisque servit utilitatibus; verum
 qui nullo recalcitrantis fortunæ respectu territus mi-
 serorum sublevar ærumnas, qui contemptis immi-
 nentium malorum minis sociis amicisque fideliter
 succurrit, & pro tanta sibi fide, proque tanta be-
 nignitate, nihil umquam deberi patitur. Atque hæc
 tua si fuisset mens, Elizabetha, si hic tuus in pro-
 pugnanda patriæ nostræ libertate fuisset animus,
 non conceptum capta Antverpia sædus, & num-
 quam a te pie servatum in tam longe aliam postea
 fuisset sententiam mutatum, ut obstrictos haberes

J. TOLLII ORATIO

Batavos, ipsa cum tuis ab omni libera fores præ-
 statione. Imputasti, imo supra modum imputasti
 stipendia, dilectus, vecturas, aliaque belli onera:
 & ad octuagies centena florenorum millia produ-
 ctum acerbius aliquando exegisti debitum, quam ab
 Amica & Socia Regina par & æquum erat. Tace-
 bo Brilam, Flissingam, & castellum Walachriæ
 Zeburgum, his expensis oppignerata; & sus-
 pectos Leicestrii conatus, ne maximis Reginæ laudi-
 bus obtrectare velle videar, silentio præteribo. Il-
 lud mihi tantum memorandum incumbit, multis
 ab illo tempore fœderibus conjunctos Anglos Ba-
 tavosque, contractamque amicitiam, cujus æter-
 nitatem nostri jam tum sibi polliceri videbantur.
 Confirmavit deinceps hanc opinionem propulsa-
 ta communibus viribus, & in fœdam pars abacta
 fugam, pars capta submersaque classis Hispano-
 rum: cujus fiducia Parmensis ipsam sibi suove re-
 gi Britanniam destinabat. Jam vero Gaditana cæ-
 teræque expeditiones, submissa continenter auxi-
 lia, & inexplicabile semper bellum, animi quid-
 dam in se fraterni & unius habebant. Succedens
 Elizabethæ Jacobus, ut cum hoste nostro pacem,
 ita nobiscum semper amicitiam coluit: & ubi ille
 vita functus, paternis insistens vestigiis Carolus,
 collocata Principi nostrati Arausionensi filia, an-
 tiqua

triqua foedera renovavit. Multa possent mutuæ benevolentiae recenseri argumenta, quibus tanquam sigillis æterna inter hæc gentes videretur consignata societas. Voluit supremus rerum Arbiter ostendere, voluit palam facere, quam nihil hic firmum aut stabile, quam omnia fallaci & ad nutum suum ruituro ponderi inniterentur. Exarsere tantis in nos odiis Angli (quid Anglos dico? fratres nostri) ut in comploratum & confessum nostræ Libertatis interitum duratura viderentur. Illæ ipsæ manus, quæ ab jugulis nostris Hispanorum mucrones auerterant, & succedentes Hispanis, eorumdemque hebetatos impetus mutatis vicibus redintegrantes e Germania Austriacos retuderant: illæ, inquam, salutares quondam manus fauces nostras premere non dubitaverunt. O rem prodigiis adnunciandam! Hi, qui quondam nobiscum arma sociaverant, in nos eadem converterunt, ut nostra destruerent. Hi, quorum majores ingentes sumptus, & grandes pecuniarum acervos erogaverant, ut rem nostram publicam augerent ditarentque, ut partas a nobis tanta cura, torque sollicitudinibus atque periculis opes devorarent, indixere bellum. Hi, qui civilibus bellis extorrem patria, regno, fortunis omnibus a nobis Regem, & (qualis esse sub justo rege potest) libertatem receperant, eundem illum

J. TOLLII ORATIO

regem stimulare non destiterunt ut in nos primum restitutas vires exerceret; sæviret in captivos; strenuissimum quemque fraude, ceteros fame, ferro, peste, circumveniret & exstingueret. At hanc quidem animi exiliis efferati truculentiam nulla tacebit ætas: tamque immane facinus non a Carolo, sed a prioris Caroli trucidatore Cromwellio perpetratum posterius contendunt. Sed unde petita belli causæ? aut e quo armamentario tela deprompta sunt? quod initium armorum tantum non civilium, & funestæ dissensionis? Imaginarius viduatæ suo custode reip. Anglicanæ Protector, cum scelestissimo, & parricidiali sanguine imbutus grege sanguinem sitiens, implere in scenam mimum non poterat, nisi, quæ deërant, ornamenta invalidis tunc temporis, & gravi intestinorum morbo laborantibus vicinis extorqueret. Et ut esset, quod magis indignarentur homines, titulum & speciem voluit homo innocentissimus, ne injusto videretur Amicos bellosacessere, tamquam ad aram Justitiæ regem optimum mactasset. Pudet eloqui, & fatendum tamen est, neque licet rem manifestissimam dissimulationis involvere tenebris, variis subactos cladibus concedere coëgit invitos, quod a volentibus impetrare nequiverat. Tam facilis de tam valida, tantæque famæ ac nominis gente victoriam, quæ per octoginta

D E P A C E.

ta secum annos bellanti leges prope præscripserat Hispano, superbissimus excepit fastus, & qui fastum individuus consequitur comes, devicti populi contemptus. Quid? quod & aliæ nationes, & illi ab suo septemtrione ferociam spirantes Sueci elanguisse antiquam Batavorum robur, & extinctam jacere fortitudinem, parum aberat quin sibi persuaderent. Ausi tentare fortunam maris, & (o dedecus!) classe nobiscum congregi, ut pedestri deinceps bello nos perdomarent. Ignominia sæpe acuit virtutem: & salutare quandoque fuit aliorum expositum fuisse ludibrio. Castigata demum illorum temeritas, & fracti non maritimo tantum, sed quo invictos se crediderant, terrestri bello conatus, docuerunt alios, quam parum tutum esset in potentiores insolenter insurgere, quamque parum in elata atque arroganti superbia foret præsidii. Revirescere exinde Batavæ strenuitatis gloria, & tamquam recisa ad radicem usque fruteta novos emittere laudis duraturæ furculos, qui mox in eximie magnitudinis arbores exerescerent. En! acuit iterum Invidia dentes, & se cum Avaritia conjungens in florentis exitium conspirat. Hoc unum deërat nobis, Batavi, ut Anglorum cupiditatem armorum nostrorum reverentia restringeret. At quis ultra ingentem genti superbiam, & incitantis iterum Inimici dolos, fortunæ

J. TOLLII ORATIO

prioris recordatione intumescences nostri respectus deterreret? Abactæne priori bello naves petiitis ab utroque sole mercibus onustæ? num in fugam nostræ classes conjectæ, captæ, depressæque? num post immensam omnis generis opum rapinam expressa nautici apparatus impendia, & extorta in redemptionem belli haud mediocris argenti summa? Hæcine erant, quæ quiescendi Britannis consilia suggererent? hæcine erant, quæ nos metuendos; hæcine, quæ ab inhiantium tam paratæ, ut exstimabant, prædæ rapacitate præstarent immunes? hæcine erant, quæ Regem ab exsilio reducem, omniumque rerum necessariorum indigum, & amicos Regis famelicos retinerent, ne in uberrimum copiarum cornu avidas immitterent manus, hautirentque, quo vitalia jamjam tentaturam famem sedarent & explerent? Quid? numquid non & feræ bestiarum, carentiaque rationis animalia, fame dominante, ad eum plerumque locum, ubi aliquando pastæ sint, revertuntur? Toties igitur Britannus nobis hostis, quoties inops: nec umquam bellare cupienti causam prætexere facile non fuit. Animum advertistis, Batavi; & eo conspiratus ivistis ad arma, quo discrimen majus erat. Obstupuit ipse ad concursantium classium fragorem Pater Oceanus, & devolutis tonitribus, lateque relucenti fulgure misceri maribus cælum, cæloque terras confundi, & in antiquum omnia redire

dire Chaos existimavit. Ipsa illa Batavorum constantia intremuit: nihilque sibi timendum rata al-
 buit Albion metu. Fugati primum; dein victores;
 postmodum dubio Marte discedentes, & victis pro-
 piores quod discedebamus; ad postremum tamen
 victricia ultro intulimus arma, & in suis hostem sedi-
 bus quæsimus, deprehendimus, affliximus. Hic dies
 solidam nobis pacem dedit, quo in stationibus exu-
 stæ naves hostium, ignes ignibus redditi, & Rex eo
 deductus angustiarum est, ut timens pallensque, ut
 extrema belli metuens dedecora tam cupide in Pa-
 cis foedera descenderet, quam illa nuper superbe re-
 spuerat. Hic dies annuis nobis hilaritatibus, hic fe-
 stis ludis celebrandus est, quo nos Angli habere
 despectui dedidicerunt; quo Britannia, ad veri ti-
 moris adacta confessionem, cæteras Europæ natio-
 nes coëgit confiteri, Esse Batavos invictam terra-
 marique gentem, custodem recti, æqui justique
 violatores coërcentem; ubi non lacessitur, num-
 quam impugnantem; ubi impugnatur, strenue jus
 suum libertatemque tuentem; & cum succumbere
 videtur, tum se demum erigentem; adeoque longe
 lateque minas terroremque circumferentem, ut quo
 fama nomen tulerit adesse & inhærere jammodo
 repugnantium jugulis videatur. Hoc die interrupta
 cum exteris, cum propinquis, cum longinquis com-
 mercia

J. TOLLII ORATIO

mercia restituta sunt ; hoc jura nostra confirmata : hoc die demum non liberi renunciati, sed libertas mihi nostra constabilita videtur. Quid assertam Guineam, & auriferos Africæ tractus commemorem ? quid salvas in Indis amplissimas possessiones, nervos ac sanguinem nostræ reip. ? quid aperta liberaque maria, quæ vel columnæ Herculis, vel Arces impostæ coartant ? Navigatur iterum Oceanus, regionesque, quæ vel viciniore tepent sole, vel quas sævus & nimio frigore rigens adurit septentrio, ab intrepidis adeuntur : & quidquid ubique gentium, quidquid in remotissimis terrarum oris gignitur, commeantium ultro citroque Batavorum industria tantâ copiâ invehitur, ut apud nos natum esse videatur. Absurdum videtur, nec est tamen, inter mutatas Indorum merces & Sinensium murrhina, inter Erythrei maris spolia, & odores Arabum, fetentes haleces adnumerare. Hic nobis certissimus ex hostili paullo ante, nunc amico mari reditus : hic penus profundus & inexhaustus, innumera hominum millia continuatis pascens alimentis : hic inæstimabilis thesaurus auriferis porior metallis, & ditibus argenti venis luculentior. Quis non laboriosæ gentis miretur industriam, in alieno solo parantis, quod ab accolis frustra quaritur ? Labor, labor, & ille quidem improbus,

nec

nec ulla renitentis fortunæ contumacia delassandus vincit omnia, ipsamque pariter, etiam si extra illa omnia, naturam. Hinc exiguis circumscripta limitibus regio, & magna sui parte vel aquis interscissa, vel nigrantium cespitum voraginoso solo recedens, vel arentibus sterilium arenarum collibus infecunda, omnis sexus ætatisque hominum infinitam ac innumerabilem alit multitudinem: & quæ in patria quæque sua non invenerant, quæ vitam tuerentur, exteris quoque præbet nationibus alimenta. Quæ si jure merito admiramur, & tacitis cogitationibus suspicimus, stupeamus profecto necesse est ad illarum præcipue gentium nigerrimam invidiam, quarum incolis, in gravissimis bellorum procellis omnium quandoque fortunarum passis naufragium, non portum tantum & refugium sæpe præstitit tutissimum; sed tamquam indigenas & cives suscepit fovitque. Quanta nobis igitur, o Baravi, gaudendi materies; quanta seges lætitiæ & exultationis, quum sævo livore tantas nequidquam sese videamus cruciare, & ab omni consilio ac sanæ mentis sobrietate deturbatos, quasi nostra illis felicitas adhiberet tormenta, sævissimis mœroris stimulis, sed frustra, sed incassum exagitari? Hic dies horribiles tam iniqui odii tenebras non occasura claritate fugavit; & oriens nostræ gloriæ malignas

J. TOLLIORATIO

& improbas invidentium spes coëgit occidere. O candidum diem! o meliore signandum lapillo temporis momentum, quod gravissimis nos intricatos angustiis tam feliciter expedivit! quod jamjam titubantes ut in æternum collaberemur, non retinuit modo & confirmavit; sed tanto robore maectavit, erexit, elevavit, ut cum bono Deo casum tam periculosum haud amplius vereamur. Repetamus animis pericula, quibus simus defuncti: revolvamus cogitationibus, in quibus simus versati, & quæ nos discrimina versaverint. Quo cum hoste confliximus? quocum adversario nos fortuna composuit? num cum degeneri? num cum viribus impari? Testantur maria nostro pariter & hostili sanguine purpurantia: & fluitantia passim cadavera, quam cum non imbelli fuerit hoste pugnatum, aperte satis indicant. Magni stetit hæcce felicitas: carius tamen; si res ita poposcisset, emenda. Hinc terrebat Suecus, in omnem paratus occasionem, intentusque; &, ni melior Deus obstitisset, turpis ad instar urfi collabentis reip. sanguinem exsucturus. Inde Monasteriensis Antistes, armis gerendis quam sacris curandis aptior, incautos & ab illo sibi hoste minimum metuentes vulnere pæne lethifero debilitabat. At hunc contracta quidem undique Sociorum auxilia, & restituta militari Gallorum disciplina copiarum nostrarum compescuere. Sed
lon-

longe nobis adversus Anglos in partibus Gallus Danusque. Hunc confessa infirmitas exemit discrimini : illum seu semper Liliis adversus aquilo, sive dissimulata imbecillitatis conscientia retardavit. Nostra igitur nobiscum Socii virtute fruuntur; & anceps bellum hoste ne quidem viso confecerunt. Quod si recte rerum omnium momenta contuemur, si æquâ singula lance perpendimus, tam prosperis nos Divina benignitas beavit successibus, ut vota superaverint : & cum ostendere vellet, quam sibi essemus chani, segregavit rejecitque Socios, ne in uberrimam, quam nobis destinaverat, gloriæ messem suas illi falces immitterent. O inexhaustam Bonitatis copiam ! o humanæ mentis captum superantem Gratiam ! Vincere nos voluit, & solos vincere. Jö, Jö Deus Opt. Max. tu nos ab insolenter insultante vindicasti adversario : tu dolosum & vasserrimè adrepentem rejecisti insidiatorem : tu inimicum jam animo nos & oculis devorantem adeo non explere voracitatem permisisti, ut morientum sibi fame præsentiat, & in propria viscera rabidos acuendos dentes, ni paratior esca objiciatur. Ite nunc igitur triumphatores hostium fortissimorum Batavi, & divini favoris inæstimabile munus indefessa gratiarum actione prosequimini. Suspendite in sanctissimis vestrarum mentium templis verâ,

J. TOLLII ORATIO

nec ullo fallacis simulationis fūco oblita, grati animi donaria. Ne fulgens aurum dicat: ne splendida lapillorum donate munera: ne nitentes date margaritas: ne redolentia Sabæorum adolete thura: sed æqui justique tenaci insistite proposito; benefactis invidiam superate; & afflictis succurrite. Sic jugis erit cum vestro vobis Deo pax; & quam diu perennis cum Deo, tam diu perpetua cum bene vel male volentibus amicitia, aut certa victoria. Solent successus plerumque prosperi leves inflare animos, & vana gloriæ titillatione delectatos ad summum sapissime fastus efferte fastigium, ut tanto deinde turpius inde deturbentur, quanto sese ridentis fortunæ blanditiis incautius permiscere. Non ex antiquorum petita temporum annalibus exempla suggeram; non ex diversarum gentium historiis deprompta documenta ponam ob oculos; non in ipsa hostium diligentius inquiram monumenta, ut & ita ex hoste proficere discatis: Sed tu, tu mihi, Mater Batavia, testis eris, quam levi momento res florentissimæ, & ipsam supra fortunam quasi evectæ, collabantur & pessum eant. Cohorrescis etiam nunc, scio, illa ipsa gravissimorum periculorum, quæ quandoque adisti, recordatione: & ad nomen Flandrici prælii; ad hostium sub Comite Bergio in Velaviam irruptionis

S U T D E P A C E

ptionis commemorationem ; ad obsidii Trajectensis fragorem, & minantis Papenhæmii tonitrua, tamquam in ipsis etiam nunc versare discriminibus, contremiscis. En tibi amplissimas in America possessiones, cum omnia viderentur ex voto fluere, ab Lusitano ereptas: en Formosam nuperrime, (& a quo hoste?) ademptam: quodque vix apud minores nostros fidem merebitur, a Monasteriensi nuper Præsule non ingens tantum illata tibi clades est, sed tam fortiter hactenus propugnata Libertatis certissima perniciēs, excidium, interitus, non ostentata, sed ingesta; non imminētia sed præsētia; non effugium secum aliquod trahētia, sed indeclinabilia: ni recta prudentis Antistitis consilia sapientior humanarum rerum moderator Deus in prævum detorsisset & ex ipsa proditoris Schulenburgii malitia insperatam tibi salutem fabricasset. Itaque te Lacedæmonii Chilonis moveat præceptum: &, si quæ nocuere docent, tantis docta malis insolentem tuarum virium fiduciam abjice, remove, repelle. Nescis, ut in excelsa subveſti loca subitâ, nisi caveant, vertigine corripiantur, seque in exitium præcipitent? Sed haud fas est tam auspiciis iniriis male ominari: dicenda sunt bono die bo-

J. TOLLII ORATIO

na verba, & savendum linguis est. Vive igitur, Mater, & diu felixque vive: vive semper tua, semper tota, semper una. Concordia res parvæ crescunt, & in unum conjunctæ fasciculum sagittæ haud facile franguntur. Quæ dum tu sapientium Regum dicta factaque assidue usurpas, continuato usu fecisti tua. Sertorianus miles, utut validus & juvenili fretus robore, universas equinæ caudæ setas evellere nequivit, quas singulas absque negotio fessus ætate & defectus viribus senex carpsit. Quid illa revoco? quin ipsa tibi priore bello fuisti exemplum: & quid in utramvis partem concors animus aut pertinax discordia valeat, & tunc experta es, & nunc ostendisti. Fertur maritali thoro viduata Semiramis sumpta virili veste mentita sexum, ne solertia partum regni decus naturæ vitio cogeretur relinquere: Tu viriles indue curas, ne tot fortissimorum virorum capitibus, tot strenuorum civium sanguine redempta libertas feminea tibi pereat ignavia. Libera Massiliensium civitas solempni Floraliū die per amicitie speciem inter vina & epulas pæne capta, claudere exinde portas festis diebus, agere vigilias, stationes in muris disponere, peregrinos recognoscere solita, & in omnes intenta belli curas pacis tempore fuisse per-

DE PACE

perhibetur. Prudentissimus ille, qui in pace bellum, in bello pacem; qui cum Hannibale non minus in secundis adversa, quam in adversis secunda cogitat. Tum demum, Mater, carebis periculo, ubi te numquam securam esse credideris; & quæ etiam tuta, timueris. Circumstant te a fronte, a tergo, a lateribus aperti hostes, inimici tecti, infidi socii: omnes cum fortuna vultum muraturi; & quo illa se inclinaverit, eodem immani pondere incubituri: sed lubentissime in te. Te petunt, tibi nectunt laqueos, tuæ imminent libertati. Sunt, qui te in iustum conjugium; sunt, qui in pellicatum velint: sed & pellicatus probro plenus, & conjugium molestum est. Una igitur cavendo salus: & ni cauta fueris, etiamsi Lucretia sis, invenies Tarquinium. Nec plura providam monere necesse est: & ad vos iterum mihi, Batavi, convertendus sermo est. Est illud magnis motibus familiare, ut non repente confidant; & turbatum validis tempestatibus mare non statim cum silentibus ventis conquiescit: sed in altos etiam tunc fluctus attollitur; sensim deinde ac pedetentim minas remittit, placaturque. Quod si igitur neque vos irarum fluctus evestigio potestis componere, si æstuantis animi necdum valetis sedare motus; quod maria quamvis perturbatissima fertur tranquillare, men-

J. TOLLII ORATIO

mentes vestras serenet oleum : non illud quidem e sudantibus arborum corticibus defluens, non ex coëcervatis seminibus extortum, non ex pinguibus baccis expressum : sed ex pristina benevolentia & antiqua concordia fontibus ebulliens. Satis jam diu bellatum est : jam satis diu tentata vires, & quid in armis possitis, ostensum. Jungite rursus dextras, & cum dextris animos : quique vel animi vel dextrae in omnem intentae noxam, in omnem inferendi damni, calamitatis, pernicii occasionem atrectae promptaeque fuere, depositis simulatibus mutua procurent commoda ; ad restituenda conspirent commercia ; eoque propensiores sint & alacriores ad redintegratam tuendam amicitiam, quo cautius in rediviva & ex inimiciis in gratiam revocata, quam in continuata & nulla corrupta offensione amicitia vitandae suspiciones sunt. Longum foret & ineptum, Cives, pacis hic recensere commoda, tot eloquentissimorum virorum facundia decantata ; & ingenti verborum volubilitate longaeque quaesitis ambagibus idem dicere. Ite vos modo, & laetos laetis animis ignes accendite : Ite, & vestra, quibus estis damnati, vota solvite ; & ex antiqua formula lubentes meritoque solvite. Vivet illa, quam
vester

D E P A C E.

vester vobis Deus contulit, gloria : vivet in omnem memoriam posteritatis , vigebitque cum vigente mundo, nec ante marcescet , aut exarefcens interibit , quam hæc omnis, quam cernimus , undarum cælique & terræ compages destinatis sibi divinitus ignibus dissolvetur. Numerabitur deinceps inter celebratissima vestræ fortitudinis monumenta obsessus Tamesis ; & illatus Londino terror in victoriarum vestrarum titulos referetur. Clarissima ingenia, & in gloriam nata hujus sæculi exercebunt hic vires suas : & erit altera vobis pugna, erit certamen aliud , utrum vos animosius tantas res gesseritis , an illi eloquentius conscripserint. O terque quaterque beatos, quibus tali licet æmulatione, tamque honesto inter se studio decertare ! o decus incomparabile ! quam optatum multis, & quam paucis concessum ! Omni tamen alio decore speciosior, & omni alia victoria major est , victoria sui. Vicistis Britannos Batavi, & in Britannis de toto terrarum orbe quasi triumphatis : vicistis jam ante Monasteriensem Præfulem, vicistis Suecum, vicistis Hispanum : sed toties vosmet ipsi vincitis, quoties subjectis parcitis, & superbos debellatis.

D I X I

99 957030

Handwritten text, likely a list or index, consisting of approximately 20 lines of cursive script. The text is mostly illegible due to fading and the angle of the page.

1110







Angelo * Pandimiglio *



restaurante

* 825650



* 8274800

